



«MOTTAKERNAVN»

«ADRESSE»

«POSTNR» «POSTSTED»

«KONTAKT»

Saksbehandlar, innvalstelefon

Rune Johan Mikkelsen, 5557 2181

Løyve til skadefelling av jerv i Luster kommune

Fylkesmannen i Vestland gir løyve til å felle ein jerv i perioden 2. august 2019 – 25. august 2019. Vilkår for løyvet går fram av vårt vedtak.

Vi viser til søknad av 31. juli 2019 frå Fortun beitelag og Skjolden beitelag. I søknaden har dei bedd om løyve til å skadefelle tre jerv i Luster kommune.

Etter rovviltforskrifta § 9, kan Fylkesmannen gi løyve til å felle enkeltindivid av rovvilt for å hindre skader på husdyr.

Om saka

Fortun beitelag og Skjolden beitelag har søkt om løyve til å skadefelle tre jervar i Nørstedalen og Mørkridsdalen. Bakgrunn for søknaden er tap av seks sauelam siste veka. Statens naturoppsyn har konkludert med at fire sauelam er drepne av jerv. I dei siste åra har jerv drepe sau i desse beiteområda, og det er difor skote fleire jervar tidlegare.

Heimel

Heimelen i saka er naturmangfaldlova og rovviltforskrifta.

Rettsleg grunnlag og vurderinga vår

Naturmangfaldlova

Etter naturmangfaldlova § 18 første ledd bokstav b, kan Kongen ved forskrift tillate uttak av vilt for å avverje skade på husdyr. Vilkår for å skadefelle jerv er utdjupa i rovviltforskrifta.

Det går fram av naturmangfaldslova § 7, at prinsippa i §§ 8 til 12 skal leggjast til grunn som retningslinjer ved offentleg myndigheitsutøving.

Etter §§ 8 og 9 skal offentlege vedtak som kan råke naturmangfaldet så langt det er rimeleg vere tufta på vitenskapleg kunnskap om artar sin bestandssituasjon og effekt av påverknad. Viss kunnskapsgrunnlaget er usikkert, skal ikkje mangel på kunnskap vere grunn til å unnlate å fatte eit forvaltingstiltak.



Det er god kunnskap om jerven sin bestandssituasjon i Noreg frå det nasjonale overvåkingsprogrammet for rovvilt. Kunnskapsgrunnlaget er difor tilstrekkeleg, og føre-var-prinsippet i § 9 har mindre relevans i saka.

Vidare følgjer det av § 10 at påverknaden på økosystemet skal vurderast ut frå ei samla belastning som økosystemet er eller vil bli utsett for. For rovviltregion 1 er det ikkje mål om ynglande jerv, og rovviltnemnda har for 2019 satt ei kvote på å felle åtte jerv i region 1. Det er ikkje skote jerv hittil i år. Vi meiner difor at skadefelling av ein jerv ikkje undergrev § 10. Vi vurderer det også slik at felling av ein jerv ikkje vil føre til irreversibel skade på bestanden etter § 12.

Naturmangfaldlova § 11 gjeld kostnadane ved miljøforringing, og er ikkje aktuelt her.

Etter ei samla vurdering finn vi at miljørettsprinsippa i naturmangfaldlova ikkje er til hinder for å gje løyve til å skadefelle jerv i denne saka.

Rovviltforskrifta

Føremålet med rovviltforskrifta er å sikre ei berekraftig forvaltning av jerv og anna rovvilt. Forvaltninga skal også ta omsyn til næringsutøving og andre samfunnsinteresser.

Etter forskrifta § 9 kan Fylkesmannen gi løyve til å felle enkeltindivid av rovvilt for å hindre skader på husdyr. Felling må skje i samsvar med den årlege kvota gitt av rovviltnemnda, og berre viss det ikkje finst ei anna tilfredsstillande løysing ut frå prinsippet om geografisk differensiert forvaltning. Løyve til å felle rovvilt skal særleg ta omsyn til området som beitemark, skadane sitt omfang og utvikling, potensialet for framtidige skadar og moglegheita for å gjennomføre førebyggjande tiltak.

Felling skal vere retta mot bestemte individ. Vedtak om felling skal vere avgrensa til eit bestemt område, tidsrom og kor mange dyr.

Region 1 er eit tyngdepunkt for sauene i landet. Det er difor ikkje mål om ynglande jerv i region 1, og heile regionen er prioritert for beitedyr framfor rovvilt. Forvaltingsplanen seier at regionen ikkje skal ha skadegjerande rovvilt. Streifdyr av alle fire artane må likevel kunne pårekna.

Statens naturoppsyn har bekrefta at fire lam er drepen av jerv, mens to drap er usikre. I dette tilfellet er det uklart om det dreier seg om streifdyr eller ynglande jerv. Nokre av dei påviste skadane kan tyde på at det er ungdyr som har drepe beitedyra. Det er usikkert kva alder og kjønn av jerv som har drepe lam, og ein har ikkje nye observasjonar av jerv i område. Vår vurdering er difor å gi løyve til felling av ein jerv i denne saka. Om felling lukkast og/eller jerv blir observert, kan det gi betre kunnskapsgrunnlag til å vurdere ein ny søknad om skadefelling av fleire individ.

Då det er mykje beitedyr i området, og det ligg føre haldepunkt for at jerv har yngla i område over fylkesgrensa til Oppland, er vår vurdering at skadepotensialet er stort.

Det er vanskeleg å sette i verk rasjonelle førebyggjande tiltak på dette tidspunktet i beitesesongen. Etter vår vurdering vil dette vere særskildt kostnads- og ressurskrevjande. Det går også fram av forvaltingsplanen for rovvilt i region 1, at felling er viktigare som førebyggjande tiltak, enn tiltak som rettar seg mot sauene. Vi kan difor ikkje sjå at det er grunnlag for å pålegge søkerane å gjennomføre andre førebyggjande tiltak for å hindre skade på beitedyra.

På bakgrunn av ei samla vurdering meiner Fylkesmannen i Vestland at det ikkje ligg føre ei anna tilfredsstillande løysing enn felling av jerv. Vi har difor fatta følgjande vedtak:



Fylkesmannen i Vestland gir løyve til å felle ein jerv i Luster kommune frå 2. august til 25. august 2019. Luster kommune er ansvarleg å organisere skadefellingslaget.

Følgjande vilkår for vedtaket er:

- Fellingsområdet er avgrensa i vest frå Luster via Spørteggbreen til fylkesgrensa til Oppland i nord, og mot aust langs FV 55 frå fylkesgrensa til Oppland og til Skjolden.
- Ved mistanke om yngling, skal Statens naturoppsyn og Fylkesmannen kontaktast straks.
- Luster kommune er ansvarleg for organisering av fellingslaget. Fellingsforsøket skal leiast av ein fellingsleiar. Om det skal vere fleire jegerar, er fellingsleiar ansvarleg for å utnemne desse. Alle i fellingslaget skal vere kjende med innhaldet i dette brevet og dei generelle reglane i rovviltforskrifta og i forskrift om utøving av jakt, felling og fangst.
- Fellingsforsøk og felling kan skje utan omsyn til grunneigarretten, jf. viltlova § 35. Fellingsleiar kan vurdere om det er trong for å be Statens naturoppsyn om bistand i fellingsforsøket eller på anna vis vere til hjelp med sin kompetanse.
- Ved felling skal det nyttast våpen og ammunisjon godkjend for storviltjakt, jf. forskrift om utøving av jakt, felling og fangst §§ 15 og 16.
- Jegerane skal ved bruk av rifle ha avlagt storviltprøve i 2019. Felling eller forsøk på felling av jerv skal straks meldast til Fylkesmannen (tlf: 481 43 095) og Statens naturoppsyn (tlf: 480 94 364). Den som feller dyr skal framvise felt dyr for Statens naturoppsyn for kontroll, merking og prøvetaking av biologisk materiale, og skyttar skal kunne påvise fellingsstad (eller eventuelt skotplass) etter oppmoding frå Statens naturoppsyn, Fylkesmannen eller politiet.
- Felt dyr i medhald av dette løyvet er Viltfondet sin eigedom. Ingen kan difor på noko vis gjere seg nytte av felt dyr eller deler av dyret utan samtykke frå Miljødirektoratet. Felt dyr skal så raskt som mogleg fraktast til Norsk institutt for naturforskning i Trondheim.
- Om jerv blir skadeskoten, pliktar dei ansvarlege å gjere det dei kan for avlive dyret snarast mogleg. Skyttar pliktar å forvisse seg om dyr det er skote på er treft eller ikkje. Ved skadeskyting skal skyttar utan opphald melde frå til Fylkesmannen, Statens naturoppsyn og næraste politimynde. Fylkesmannen avgjer vidare gjennomføring og avslutning av ettersøk.
- Fylkesmannen kan til ein kvar tid endre eitt eller fleire av vilkåra, eller trekke tilbake fellingsløyvet.
- Skadefellingslaget vil få dekkja direkte og dokumenterte kostnader ved fellingsforsøket, avgrensa til 10.000 kroner. Beitelaga/fellingslaget skal sende skadefellingslogg til Fylkesmannen innan tre veker etter at skadefellingsforsøket er avslutta.

Klage

Vedtaket kan påklagast innan tre veker. Ei eventuell klage sendast til Fylkesmannen i Vestland.

Med helsing

Kjell Kvingedal
miljødirektør

Rune Johan Mikkelsen
seniorrådgjevar

Dokumentet er elektronisk godkjent



Mottakerliste:

SKJOLDEN BEITELAG	v/Arne Rebni Øvreås	6876	SKJOLDEN
FORTUN BEITELAG	Holmastad	6877	FORTUN
VEST POLITIDISTRIKT	Postboks 85	6901	FLORØ
Statens Naturoppsyn			
LUSTER KOMMUNE	Rådhusvegen 1	6868	GAUPNE
Roviltnemnda region 1			
MILJØDIREKTORATET	Postboks 5672 Torgarden	7485	TRONDHEIM